

摘藻堂四庫全書薈要

史部

欽定四庫全書薈要

史部  
明史卷三百六



詳校官中書臣劉源溥

欽定四庫全書薈要卷六千八百九十九

史部

明史卷三百六

大學士張廷玉等奉 敕修

傳第一百九十四

閹黨

明代閹宦之禍酷矣然非諸黨人附麗之羽翼之張其勢而助之攻虐燄不若是其烈也中葉以前士大夫知重名節雖以王振汪直之橫黨與未盛至劉瑾竊權焦



芳以閣臣首與之比於是列卿爭先獻媚而司禮之權居內閣上迨神宗末年訛言朋興羣相敵讐門戶之爭固結而不可解凶豎乘其沸潰盜弄太阿黥桀渠儉竄身婦寺淫刑痛毒快其惡正醜直之私衣冠填於狴犴善類殞於刀鋸迄乎惡貫滿盈亟伸憲典刑書所麗迹穢簡編而遺孽餘燼終以覆國莊烈帝之定逆案也以其事付大學士韓爌等因慨然太息曰忠賢不過一人耳外廷諸臣附之遂至于此其罪何可勝誅痛乎哉患

得患失之鄙夫其流毒誠無所窮極也今錄自焦芳張綵以下迄天啟朝為閹黨列傳用垂鑒誠其以功名表見或晚節自蓋如王驥王越楊維垣張捷之徒則仍別見焉

焦芳

劉元字

張綵

韓福等

顧秉謙

魏廣微等

崔呈秀

吳淳夫等

劉志選

梁夢環等

曹欽程

石三畏等

王紹徽

周應秋

霍維華

徐大化等

閻鳴泰

賈繼春

田爾耕

許顯純

焦芳泌陽人天順八年進士大學士李賢以同鄉故引為庶吉士授編修進侍講滿九年考當遷學士或語大學士萬安不學如芳亦學士乎芳聞大恚曰是必彭華間我也我不學士且刺華長安道中華懼言于安乃進芳侍講學士先是詔纂文華大訓進講東宮其書皆華等所為芳恥不與每進講故摘其疵揚言衆中翰林尚

文采獨芳麤陋無學識性陰狠動輒譏訕人咸畏避之  
尹旻之罷也芳與其子龍相比謫桂陽州同知芳知出  
華安二人指銜次骨弘治初移霍州知州擢四川提學  
副使調湖廣未幾遷南京右通政以憂歸服闋授太常  
少卿兼侍講學士尋擢禮部右侍郎怨劉健尼已日於  
衆中嫚罵健判牒不可意即引筆抹去不關白尚書俄  
改吏部轉左侍郎馬文升為尚書芳輒加姍侮陰結言  
官使抨擊素所不快及在已上者又上言禦邊四事以

希進用為謝遷所抑尤憾遷每言及餘姚江西人以遷及華故肆口詬詈芳既積忤廷臣復銳進乃深結閹宦以自固日夜謀逐健遷代其位正德初戶部尚書韓文言會計不足廷議謂理財無奇術唯勸上節儉芳知左右有竊聽者大言曰庶民家尚須用度況縣官耶諺云無錢揀故紙今天下逋租匿稅何限不是檢索而但云損上何也武宗聞之大喜會文升去遂擢為吏部尚書韓文將率九卿劾劉瑾疏當首吏部以告芳芳陰洩其



謀於瑾瑾遂逐文及健遷輩而芳以本官兼文淵閣大學士入閣輔政累加少師華蓋殿大學士居內閣數年瑾濁亂海內變置成法荼毒搢紳皆芳導之每過瑾言必稱千歲自稱曰門下裁閱章奏一阿瑾意四方賂瑾者先賂芳子黃中亦傲很不學廷試必欲得第一李東陽王鏊為置二甲首芳不悅言於瑾徑授翰林檢討俄進編修芳以黃中故時時詈東陽瑾聞之曰黃中昨在我家試石榴詩甚拙顧恨李耶瑾怒翰林官傲已欲盡

出之外為張綵勸沮及修孝宗實錄成瑾又持前議綵復力沮而芳父子與檢討段昊輩教瑾以擴充政事為名乃盡出編修顧清等二十餘人於部曹有司應詔舉懷材抱德之士以餘姚人周禮徐子元許龍上虞人徐文彪四人名上瑾以禮等皆遷鄉人而詔草出健因下四人詔獄欲併逮健遷東陽力解之芳厲聲曰縱貫其罪不當除名耶乃黜健遷為民而榜逐餘姚人之為京官者滿刺加使臣亞劉本江西萬安人名蕭明舉以罪

判入其國與其國人端亞智等來朝既又謀入淖泥國  
索寶且殺亞智等事聞方下所司勘奏芳即署其尾曰  
江西土俗故多玩法如彭華尹直徐瓊李孜省黃景等  
多被物議宜裁減解額五十名通籍者勿選京職著為  
令且言王安石禍宋吳澄仕元宜榜其罪使他日毋得  
濫用江西人楊廷和解之曰以一盜故禍連一方至裁  
解額矣宋元人物亦欲併案耶乃止芳深惡南人每退  
一南人輒喜雖論古人亦必詆南而譽北嘗作南人不

可為相圖進瑾其總裁孝宗實錄若何喬新彭韶謝遷  
皆肆誣詆自喜曰今朝廷之上誰如我直者始張綵為  
郎時芳力薦以悅瑾覲其為奸利比綵為尚書芳父子  
薦人無虛日綵時有同異遂有隙而段炅見瑾暱綵芳  
勢稍衰轉附綵盡發芳陰事於瑾瑾大怒數於衆中斥  
芳父子芳不得已乃乞歸黃中勾閣廕以侍讀隨父還  
瑾敗給事御史交劾削其官黜黃中為民久之芳使黃  
中齎金寶遺權貴上章求湔雪復官為吏科所駁於是

吏部覆奏請械繫黃中法司以彰天討黃中狼狽遁走  
芳居第宏麗治作勞數郡大盜趙鏹入泌陽火之發窖  
多得其藏金乃盡掘其先人塚墓雜燒以牛馬骨求芳  
父子不得取芳衣冠被庭樹拔劍斫其首使羣盜麋之  
曰吾為天子誅此賊鏹後臨刑歎曰吾不能手刃焦芳  
父子以謝天下死有餘恨謹從子二漢當死亦曰吾死  
固當第吾家所為皆焦芳與張綵耳今綵與我處極刑  
而芳獨晏然豈非冤哉芳父子竟良死劉宇宇至大鈞

州人成化八年進士由知縣入為御史坐事謫累遷山東按察使弘治中以大學士劉健薦擢右僉都御史巡撫大同召為左副都御史正德改元吏部尚書馬文升薦之進右都御史總督宣府大同山西軍務宇初撫大同私市善馬賂權要兵部尚書劉大夏因孝宗召見語及之帝密遣錦衣百戶邵琪往察宇厚賂琪為之抵諱後大夏再召對帝曰健薦宇才堪大用以朕觀之此小人豈可用哉由是知內閣亦未可盡信也宇聞以大夏

不為已地深憾之劉瑾用事宇介焦芳以結瑾二年正月入為左都御史瑾好摧折臺諫宇緣其意請敕箝制御史有小過輒加笞辱瑾以為賢瑾初通賄望不過數百金字首以萬金贄瑾大喜曰劉先生何厚我尋轉兵部尚書加太子太傅子仁應殿試求一甲不得厚賄瑾內批授庶吉士踰年遷編修時許進為吏部尚書宇讒於瑾遂代其位而曹元代宇為兵部宇在兵部時賄賂狼籍及為吏部權歸選郎張綵而文吏贈遺又不若武

弁嘗悒悒歎曰兵部自佳何必吏部也厥後瑾欲用緣代  
字乃令字以原官兼文淵閣大學士字宴瑾閣中極驩  
大喜過望明日將入閣辦事瑾曰爾真欲相耶此地豈  
可再入字不得已乃乞省墓去踰年瑾誅科道交章劾  
奏削官致仕子仁黜為民曹元字以貞大寧前衛人柔  
佞滑稽不修士行舉成化十一年進士授工部主事正  
德二年累遷右副都御史巡撫甘肅分守中官張昭奉  
命捕虎豹元以軍士出境搜捕恐啟邊釁上疏請止不



從改撫陝西踰年召為兵部右侍郎轉左尋代宇為尚  
書兼督團營加太子少保將校遷除皆惟瑾命元所入  
亦不貲五年拜吏部尚書兼文淵閣大學士元與劉瑾  
有連自瑾侍東宮即與相結及瑾得志遂夤緣躡至卿  
相然瑣瑣無能在閣中飲酒諧謔而已瑾敗元即日上  
疏請罪詞極哀詔許致仕言官交劾黜為民元無子病  
中自作墓志歎曰我死誰銘我者當劉瑾時廷臣黨附  
者甚衆瑾誅言官交劾內閣則焦芳劉宇曹元尚書則

吏部張綵戶部劉璣兵部王敞刑部劉璟工部畢亨南  
京戶部張潔禮部朱恩刑部劉纓工部李善侍郎則吏  
部柴昇李瀚前戶部韓福禮部李遜學兵部陸完陳震  
刑部張子麟工部崔巖夏昂胡諒南京禮部常麟工部  
張志淳都察院則副都御史楊綸僉都御史蕭選巡撫  
則順天劉聰應天魏訥宣府楊武保定徐以貞大同張  
禴淮揚屈直兩廣林廷選操江王彥奇前總督文貴馬  
炳然大理寺則卿張綸少卿董恬丞蔡中孚張檜通政

司則通政吳鉞王雲鳳參議張龍太常則少卿楊廷儀  
劉介尚寶卿則吳世忠丞屈銓府尹則陳良器府丞則  
石祿翰林則侍讀焦黃中修撰康海編修劉仁檢討段  
吳吏部郎則王九思王納誨給事中則李憲段豸御史  
則薛鳳鳴朱袞秦昂宇文鍾崔哲李紀周琳其他郎署  
監司又十餘人於是綵論死福謫戍元恩震聰訥武恬  
介黃中海仁憲鳳鳴鍾除名亨昂閒住善巖諒志淳綸  
直彥奇良器哲致仕選以貞禴中孚龍祿銓吳豸袞紀

琳九思納誨謫外朝署為清

張綵鞏昌安定人弘治三年進士授吏部主事歷文選司  
郎中議論便利善伺權貴指初矯飾徼聲譽尚書馬文  
升等皆愛之給事中劉菹嘗劾其顛倒選法數事文升  
悉為辨析且譽其聰明剛正為上下所推服詔令辦事  
如故綵即五疏移疾去文升固留不得時論稱之越數  
日給事中李貫薦綵有將畧楊一清總制三邊亦薦綵  
自代而焦芳以綵與劉瑾同鄉力薦於瑾瑾欲致之因

著令病過期不赴者斥為民綵乃就道既見瑾高冠鮮  
衣貌白皙修偉鬚眉蔚然詞辯泉湧瑾大敬愛執手移  
時曰子神人也我何以得遇子時文選郎劉永已遷通  
政次當驗封郎石確疏既入瑾令尚書許進追原疏以  
綵易之綵自是一意事瑾瑾惡進不附已綵因媒蘖去  
進以劉宇代之宇雖為尚書銓政率由綵多不關白宇  
即白宇宇必溫言降接綵抱案立語宇俯僂不敢當居  
文選半載擢左僉都御史與戶部右侍郎韓鼎同廷謝

鼎老拜起不如儀為谷大用張永輩所竊笑瑾方慚而  
綵丰采英毅大用等皆稱羨瑾乃喜越二日罷鼎而綵  
踰年超拜吏部右侍郎鼎合水人弘治時為給事中負  
直聲後遷右通政治水安平有勞績以通政使家居至  
是為瑾所引復挫歸遂失其素望瑾欲大貴綵乃命劉  
宇入內閣以綵代之一歲中自郎署長六卿僚友守官  
如故咸惴惴白事尚書前綵厲色無所假借尋加太子  
少保每瑾出休沐公卿往候自辰至晡未得見綵故徐

徐來直入瑾小閣歡飲而出始揖衆人衆以是益畏綵  
見綵如瑾禮綵與朝臣言呼瑾為老者凡所言瑾無不  
從因不時考察內外官糾摘嚴急間一用薄罰而諸司  
臺諫謫辱日甚變亂舊格賄賂肆行海內金帛奇貨相  
望塗巷間性尤漁色撫州知府劉介其鄉人也娶妾美  
綵特擢介太常少卿盛服往賀曰子何以報我介惶恐  
謝曰一身外皆公物綵曰命之矣即使人直入內牽其  
妾輿載而去又聞平陽知府張恕妾美索之不肯令御

史張禴按致其罪擬戍恕獻妾始得論減綵既銜瑾恩見瑾擅權久貪冒無厭天下怨之因乘間說曰公亦知賄入所自乎非盜官帑卽剝小民彼借公名自厚入公者未十一而怨悉歸公何以謝天下瑾大然之會御史胡節巡按山東還厚遺瑾瑾發之捕節下獄少監李宣侍郎張鸞指揮同知趙良按事福建還餽瑾白金二萬瑾疏納金於官而按三人罪其他因賄得禍者甚衆然瑾貪斂卒莫之改而人愈以此惡綵險譎矣及瑾伏誅



綵以交結近侍論死遇赦當免改擬同瑾謀反瘐死獄

中仍判屍於市籍其家妻子流海南韓福者西安前衛人也成化十七年進士為御史按宣府大同數條奏軍民利病邊人悅之弘治中遷大名知府奸盜屏跡道不拾遺政績為畿輔冠以卓異舉遷浙江左參政病免武宗立言官交薦召為大理右少卿正德二年以右僉都御史督蘇松糧儲未幾召入為右副都御史坐累下詔獄獄上劉瑾以同鄉故立命出之召與語大悅即用為

戶部左侍郎福故強幹吏所在著能聲至是受挫為瑾所拔擢遂精心事瑾為効力瑾亦時召與謀委寄亞於綵會湖廣以缺餉告命兼僉都御史往理之瑾喜操切福希指益務為嚴苛湖廣民租自弘治改元後逋六百餘萬石皆遇災蠲免福欲追徵之効所司催科不力自巡撫鄭時以下凡千二百人奏至舉朝駭愕戶部尚書劉璣等議如福言瑾忽怒福取詔旨報曰湖廣軍民困敝朕甚憫之福任意苛斂甚不稱朕意令自効吏部舉

堪代者以聞福引罪求罷乃召還四年復命覈遼東屯  
田福性故刻深所攜同知劉玉等又奉行過當軍士不  
能堪焚掠將吏及諸大姓家守臣發帑撫慰之亂始定  
給事中徐仁等極論之瑾迫公議勒福致仕明年瑾敗  
籍其貲則福在湖廣時所餽白金數十萬兩封識宛然  
遂遣戍固原李憲岐山人為吏科給事中諂事瑾每率  
衆請事於瑾盛氣獨前自號六科都給事中時袖白金  
示同列曰此劉公所遺也瑾敗虞禍及亦劾瑾六事瑾

在獄笑曰李憲亦劾我乎卒坐除名張龍順天人官行人邪媚無賴與壽寧侯通譜系因得交諸中人貴戚恃勢奪人田宅正德三年夤緣為兵科給事中出覈遼東軍餉得腐豆四石請逮問監守諸臣罰郎中徐璉以下米三百石有差瑾以為能擢通政參議瑾敗謫知灤州後又結朱寧為父起嘉興同知遷登州知府言官彈射無虛月與山西左布政使倪天民右布政使陳遠右參議孫清並貪殘天下目為四害龍朝覲入都中旨擢右

通政為寧通中外賄所乾沒不貲後以私取賄為寧所覺斥逐之嘉靖初下獄論死

顧秉謙崑山人萬歷二十三年進士改庶吉士累官禮部右侍郎教習庶吉士天啟元年晉禮部尚書掌詹事府事二事魏忠賢用事言官周宗建等首劾之忠賢於是謀結外廷諸臣秉謙及魏廣微率先諂附霍維華孫杰之徒從而和之明年春秉謙廣微遂與朱國禎朱廷禧俱入參機務廣微南樂人侍郎允貞子也萬歷三十

二年進士由庶吉士歷南京禮部侍郎忠賢用事以同鄉同姓潛結之遂召拜禮部尚書至是與秉謙俱以原官兼東閣大學士七月秉謙晉太子太保改文淵閣十一月晉少保太子太傅五年正月晉少傅太子太師吏部尚書改建極殿九月晉少師秉謙為人性極庸劣無恥而廣微陰狡趙南星與其父允貞友善嘗歎曰見泉無子見泉允貞別號也廣微聞之恨刺骨既柄政三及南星門閤人辭不見廣微怫然曰他人可拒相公尊不可拒

也益恨南星楊漣之劾忠賢二十四罪也忠賢懼屬廣

微為調旨一如忠賢意而秉謙以漣疏有門生宰相語

怒甚會孟冬饗廟且頒朔廣微偃蹇後至給事中魏大

中御史李應昇連劾之廣微益憤遂決意傾善類與秉

謙謀盡逐諸正人點指紳便覽一冊若葉向高韓爌何

如寵成基命繆昌期姚希孟陳子壯侯恪趙南星高攀

龍喬允升李邦華鄭三俊楊漣左光斗魏大中黃尊素

周宗建李應昇等百餘人目為邪黨而以黃克纘王永

光徐大化賈繼春霍維華等六十餘人為正人由奄人  
王朝用進之俾據是為黜陟忠賢得內閣為羽翼勢益  
張秉謙廣微亦曲奉忠賢若奴役然葉向高韓爌相繼  
罷何宗彥卒秉謙遂為首輔自四年十二月至六年九  
月凡傾害忠直皆秉謙票擬三朝要典之作秉謙為總  
裁復擬御製序冠其首欲用是鉗天下口朝廷有一舉  
動輒擬旨歸美忠賢褒贊不已廣微以札通忠賢簽其  
函曰內閣家報時稱曰外魏公先是內閣調旨惟出首



輔一人餘但參議論而已廣微欲擅柄謀之忠賢令衆  
輔分任政權始分後遂沿為故事楊漣等六人之逮也  
廣微實與其謀秉謙調嚴旨五日一追比尚書崔景榮  
懼其立死杖下亟請廣微諫止廣微不自安疏言漣等  
在今日誠為有罪之人在前日實為卿寺之佐縱使賊  
私果真亦當轉付法司據律論罪豈可逐日嚴刑令鎮  
撫追賊乎身非木石重刑之下就死直須臾耳以理刑  
之職使之追賊官守安在勿論傷好生之仁抑且違祖

宗之制將朝政日亂與古之帝王大不相侔矣疏入大忤忠賢意廣微懼急出景榮手書自明而忠賢怒已不可解乃具疏乞休不許居兩月矯詔切責廷臣中言朕方率循舊章而曰朝政日亂朕方祖述堯舜而曰大不相侔蓋即指廣微疏語廣微益懼丐秉謙為解忠賢意少釋然廣微卒不自安復三疏乞休六年九月許之去廣微先已加少保太子太傅改吏部尚書建極殿大學士至是復加少傅太子太師廕子中書舍人賜白金百

坐蟒一絲幣四表裏乘傳行人護歸典禮優渥猶用前  
好故也居二年卒於家贈太傅卹典如制秉謙票擬事  
事徇忠賢指初矯旨罪主考丁乾學又調旨殺連光斗  
等惟周順昌李應昇等下詔獄秉謙請付法司毋令死  
非其罪內臣出鎮秉謙撰上諭已復與丁紹軾請罷二  
事微有執爭馮銓既入閣同黨中日夜交軋羣小亦各  
有所左右秉謙不自安屢疏乞休後廣微一年致仕去  
崇禎元年為言官祖重屢徐尚勲汪應元所糾命削籍

已坐交結近侍入逆案中論徒三年贖為民二年崑山民積怨秉謙聚衆焚掠其家秉謙年八十倉皇竄漁舟得免乃獻窖藏銀四萬於朝寄居他縣以死廣微亦追論削奪列逆案遣戍中自秉謙廣微當國政歸忠賢其後入閣者黃立極施鳳來張瑞圖之屬皆依媚取容名麗逆案黃立極字中五元城人萬曆三十二年進士累官少詹事禮部侍郎天啟五年八月忠賢以同鄉故擢禮部尚書兼東閣大學士與丁紹軾周如磐馮銓並參

機務時魏廣微顧秉謙皆以附忠賢居政府未幾廣微去如磐卒明年夏紹軾亦卒銓罷其秋施鳳來張瑞圖李國樞入已而秉謙乞歸立極遂為首輔施鳳來平湖人張瑞圖晉江人皆萬厯三十五年進士鳳來殿試第二瑞圖第三同授編修同積官少詹事兼禮部侍郎同以禮部尚書入閣鳳來素無節槩以和柔媚於世瑞圖會試策言古之用人者初不設君子小人之名分別起於仲尼其悖妄如此忠賢生祠碑文多其手書莊烈帝

即位山陰監生胡煥猷立極鳳來瑞圖國樁等身居  
揆席漫無主持甚至顧命之重臣斃於詔獄五等之爵  
尚公之尊加於閹寺而生祠碑頌靡所不至律以逢奸  
之罪夫復何辭帝為除煥猷名下吏立極等內不自安  
各上疏求罷帝猶優詔報之十一月立極乞休去來宗  
道楊景辰並入閤鳳來為首輔御史羅元賓復疏糾鳳  
來瑞圖俱告歸宗道蕭山人立極同年進士累官太子  
太保禮部尚書以本官兼內閣大學士預機務宗道官

禮部時為崔呈秀父請卹典中有在天之靈語編修倪元璐屢疏爭時事宗道笑曰渠何事多言詞林故事止香茗耳時謂宗道清客宰相云景辰瑞圖同縣人萬厯四十一年進士積官吏部右侍郎與宗道同入閣官翰林時為要典副總裁一徇奸黨指又三疏頌忠賢及朝局已變乃請燬要典給事御史交劾之與宗道同日罷其後定逆案瑞圖宗道初不與莊烈帝詰之韓爌等對無實狀帝曰瑞圖為忠賢書碑宗道稱呈秀父在天之

靈非實狀耶乃以瑞圖宗道與顧秉謙馮銓等坐贖徒  
為民而立極鳳來景辰落職閒住

崔呈秀薊州人萬厯四十一年進士授行人天啟初擢  
御史巡按淮揚卑污狡獪不修士行見東林勢方盛將  
出都力薦李三才求入其黨東林拒不納在淮揚贓私  
狼籍霍邱知縣鄭延祚貪將劾之以千金賄免延祚知  
其易與再行千金即薦之其行事多類此四年九月還  
朝高攀龍為都御史盡發其貪污狀吏部尚書趙南星



議戍之詔革職候勘呈秀大窘夜走魏忠賢所叩頭乞  
哀言攀龍南星皆東林挾私排陷復叩頭涕泣乞為養  
子當是時忠賢為廷臣交攻憤甚方思得外廷為助涿  
州人馮銓少年官侍從家居與熊廷弼有隙遺書魏良  
卿勸興大獄忠賢冀假事端傾陷諸害已者得呈秀恨  
相見晚遂用為腹心日與計畫明年正月給事中李恒  
茂為呈秀訟寃中旨即言呈秀被誣復其官呈秀乃首  
疏薦張鶴鳴申用懋王永光商周祚許宏綱等而再疏

請令京官自陳由是清流多屏斥尋督三殿工忠賢以  
閱工故日至外朝呈秀必屏人密語以間進同志諸錄  
皆東林黨人又進天監錄皆不附於東林者令忠賢憑  
以黜陟善類為一空暮夜乞憐者莫不緣呈秀以進蠅集  
蟻附其門如市累擢工部右侍郎並兼御史督工如故  
御史田景新言侍郎兼御史非便請改僉都御史從之  
忠賢嘗修鄉縣肅寧城呈秀首上疏稱美六年二月復  
疏頌忠賢督工功請賜勅獎諭末言臣非行媚中官者

目前千譏萬罵臣固甘之疏出朝野轟笑閣臣顧秉謙

輩撰敕八百餘言褒忠賢極口揚詡前代九錫文不能

過也自是中外章疏無不頌忠賢功德者矣時方朔三

朝要典呈秀疏陳要典之源追論並封妖書之藩三事

凡擁衛光宗者悉加醜詆忠賢悅宣付史館其年七月

進本部尚書十月皇極殿成加太子太保兼左都御史

仍督大工母死不奔喪奪情視事呈秀負忠賢寵嗜利

彌甚朝士多拜為門下士以通於忠賢其不附已及勢

位相軋者輒使其黨排去之時有五虎之目以呈秀為  
魁諸所傾陷不可悉數雖其黨亦深畏之子鐸不能文  
屬考官孫之獬獲鄉薦用其弟凝秀為浙江總兵官女  
夫張元芳為吏部主事妾弟優人蕭惟中為密雲參將  
所司皆不敢違明年八月冒寧錦功加太子太傅俄  
敘三殿功加少傅世廕錦衣指揮僉事其月遷兵部尚書  
仍兼左都御史並綰兩篆握兵權憲紀出入烜赫勢傾  
朝野無何熹宗崩廷臣入臨內使十餘人傳呼崔尚書

甚急廷臣相顧愕眙呈秀入見忠賢密謀久之語秘不得聞或言忠賢欲篡位呈秀以時未可止之也莊烈帝卽位其黨知忠賢必敗內相攜副都御史楊所修首請允呈秀守制御史楊維垣賈繼春相繼力攻呈秀乞罷帝猶慰留章三上溫旨令乘傳歸已而言者劾呈秀及工部尚書吳淳夫兵部尚書田吉太常卿倪文煥副都御史李夔龍號稱五虎宜肆市朝詔逮治籍其貲時忠賢已死呈秀知不免列姬妾羅諸奇異珍寶呼酒痛飲

盡一卮即擲壤之飲已自縊詔戮其屍子鐸除名弟凝秀  
遣戍後定逆案以呈秀為首淳夫晉江人萬厯三十  
八年進士歷官陝西僉事以京察罷五年夤緣起兵部  
郎中與文煥吉夔龍並由呈秀進為忠賢義子大學士  
馮銓釋褐十三年登宰輔為忠賢所暱呈秀妬之淳夫  
即為攻銓六年冬擢太僕少卿視職方事旋擢太僕卿  
歷工部添注右侍郎冒寧錦及三殿功累進工部尚書  
加太子太傅歲中六遷至極品倪文煥江都人由進士

授行人擢御史巡視南城山東多大猾事發則走匿京師參政王維章數牒文煥文煥納其賄反劾罷維章嘗誤撻皇城守卒為中官所糾大懼走謁呈秀求救遂引入忠賢幕為鷹犬首劾兵部侍郎李邦華御史李日宣吏部員外郎周順昌林梓喬再劾戶部侍郎孫居相御史夏之令及故吏部尚書崔景榮吏部尚書李宗延等數十人輕者削奪重者拷死呈秀首頌忠賢文煥即繼之出按畿輔為忠賢建三祠河南道缺掌印官呈秀為

懸缺待文煥至越十餘人任之冒寧錦殿功加太僕卿  
掌道如故尋改太常卿忠賢敗文煥懼乞終養歸田吉  
者故城人萬歷三十八年廷對懷挾罰三科以縣佐錄  
用已補試由知縣歷兵部郎中六年冬遷淮揚參議取  
中旨擢太常少卿視職方事明年擢太常卿未匝歲連  
擢至兵部尚書加太子太保諸逆黨超擢未有如吉者  
李夔龍福建南安人由進士歷吏部主事被劾罷去天  
啟五年賣緣復官進郎中專承呈秀指引用邪人以媚



忠賢擢太常少卿仍署選事尋遷左僉都御史三殿成進左副都御史莊烈帝嗣位淳夫文煥吉夔龍並以上林典簿樊維城戶部員外郎王守履言逮治論死方忠賢敗時莊烈帝納廷臣言將定從逆案大學士韓爌李標錢龍錫不欲廣搜樹怨僅以四五十人上帝少之令再議又以數十人上帝不懌令以贊導擁戴頌美諂附為目且曰內侍同惡者亦當入爌等以不知內侍對帝曰豈皆不知特畏任怨耳閱日召入便殿案有布囊盛

章疏甚多指之曰此皆奸黨頌疏可案名悉入爇等知

帝意不可回乃曰臣等職在調旨三尺法非所習帝召

吏部尚書王永光問之永光以不習刑名對乃詔刑部

尚書喬允升左都御史曹于汴同事於是案名羅列無

脫遺者崇禎二年三月上之帝為詔書頒示天下首逆

凌遲者二人魏忠賢客氏首逆同謀決不待時者六人

呈秀及魏良卿客氏子都督侯國興太監李永貞李朝

欽劉若愚交結近侍秋後處決者十九人劉志選梁夢

環倪文煥田吉劉詔薛貞吳淳夫李夔龍曹欽程大理  
寺正許志吉順天府通判孫如洌國子監生陸萬齡豐  
城侯李承祚都督田爾耕許顯純崔應元楊寰孫雲鶴  
張體乾交結近侍次等充軍者十一人魏廣微周應秋  
閻鳴泰霍維華徐大化潘汝禎李魯生楊維垣張訥都  
督郭欽孝陵衛指揮李之才交結近侍又次等論徒三  
年輸贖為民者大學士顧秉謙馮銓張瑞圖來宗道尚  
書王紹徽郭允寬張我續曹爾禎孟紹虞馮嘉會李春

暑邵輔忠呂純如徐兆魁薛鳳翔孫杰楊夢袞李養德  
劉廷元曹思誠南京尚書范濟世張樸總督尚書黃運  
泰郭尚友李從心巡撫尚書李精白等一百二十九人  
交結近侍減等革職閒住者黃立極等四十四人忠賢  
親屬及內官黨附者又五十餘人案既定其黨日謀更  
翻王永光溫體仁陰主之帝持之堅不能動其後張捷  
薦呂純如被劾去唐世濟薦霍維華福建巡按應喜臣  
薦部內閒住通政使周維京罪至謫戍其黨乃不敢言

福王時阮大鍼冒定策功起用其案始翻於是太僕少卿楊維垣徐景濂給事中虞廷陞郭如閤御史周昌晉陳以瑞徐復陽編修吳孔嘉參政虞大復輩相繼而起國亡乃止

劉志選慈谿人萬厯中與葉向高同舉進士授刑部主事偕同官劉復初李懋檜爭鄭貴妃王恭妃冊封事後懋檜因給事中邵庶請禁諸曹言事抗疏力爭貶二秩志選言陛下謫懋檜使人箝口結舌蒙蔽耳目非國家

福也帝怒謫福寧州判官稍遷合肥知縣以大計罷歸  
家居三十年光宗熹宗相繼立諸建言得罪者盡起志  
選獨以計典不獲與會向高赴召道杭州志選與遊宴  
彌月還朝用為南京工部主事進郎中時已七十餘嗜  
進彌銳上疏追論紅丸極詆孫慎行不道魏忠賢喜天  
啟五年九月召為尚寶少卿在道復力攻慎行遂并及  
向高忠賢益喜出兩疏宣史館明年擢順天府丞冬十  
月遂上疏劾張國紀國紀者后父也忠賢忌后賢明欲

傾之會有張匿名榜於厚載門者列忠賢反狀并其黨七十餘人忠賢疑出國紀及被逐諸人手邵輔忠孫杰謀因此興大獄盡殺東林諸人而借國紀以搆中宮事成則立魏良卿女為后草一疏募人上之諸人慮禍不敢承志選惑家人言謂已老必先忠賢死竟上之極論國紀罪而未言毋令人訾及丹山之穴藍田之種蓋前有死囚孫二言張后已所生非國紀女也疏上事叵測帝伉儷情篤但令國紀自新而已后為故司禮劉克敬

所選忠賢遷怒克敬謫發鳳陽縊殺之七年志選疏頌  
要典言命德討罪無微不彰卽堯舜之放四凶舉元愷  
何以加焉洵游夏無能贊一詞者因力詆王之案孫慎  
行楊漣左光斗而極譽劉廷元岳駿聲黃克纘徐景濂  
范濟世賈繼春并及傅樞陳九疇且言慷慨憂時力障  
狂瀾於既倒者魏廣微也當還之揆席以繼五臣之盛  
事赤忠報國弼成巨典於不日者廠臣也當增入簡端  
以揚一德之休風又言之案宜正典刑慎行宜加謫戍



忠賢大悅於是駿聲等超擢之案被逮慎行遣戍悉如  
志選言七年擢右僉都御史提督操江其年熹宗崩忠  
賢敗言官交劾詔削籍後定逆案律無傾搖國母文坐  
子罵母律與梁夢環并論死志選先自經夢環廣東順  
德人舉進士歷官御史父事忠賢興汪文言獄殺楊漣  
等出巡山海關會寧遠敘功崔呈秀不獲與夢環力敘  
其賢勞遂進侍郎劾熊廷弼乾沒軍資十七萬廷弼已  
死家益破志選之劾國紀也忠賢意未逞夢環偵知之

七年二月馳疏極論國紀罪且故詰丹山藍田二語冀  
傾后顧事重忠賢亦不能驟行而國紀竟勒還籍夢環  
建祠祀忠賢三疏頌功德寧錦之役復稱忠賢德被四  
方勲高百代於是有安平之封夢環擢太僕卿又劉詔  
者杞縣人萬厯四十七年進士授蘆龍知縣天啟二年  
超擢山東僉事七年代閻鳴泰總督薊遼保定軍務尋  
進兵部尚書加太子太保詔嗜利無恥父事忠賢釋褐  
九年驟至極品建四祠祀忠賢忠賢敗僅罷官聽勘御

史高宏圖言傾危社稷搖動宮闈如詔及劉志選梁夢  
環三賊者罪實浮於五虎五彪而天討未加且詔建祠  
薊州迎忠賢像五拜三稽首呼九千歲及聞先帝彌留  
詔即整兵三千易置將領用崔呈秀所親蕭惟中主郵  
騎直接都門此其意何為由是三人皆被建論死邵輔  
忠定海人萬歷二十三年進士為工部郎中首劾李三  
才貪險假橫四大罪尋謝病去久之起故官天啟五年  
附忠賢驟遷至兵部尚書視侍郎事諸奸黨攻擊正人

多其所主使七年三月護桂王之藩衡州加太子太保  
還朝時事已變移疾歸尋麗逆案贖徒為民孫杰錢塘  
人萬曆四十一年進士官刑科右給事中以附忠賢劾  
劉一燾周嘉謨為清議所棄出為江西參議引疾歸忠  
賢召為大理丞累擢工部右侍郎大學士馮銓由李魯  
生李蕃擁戴為首輔素與崔呈秀暱而杰與霍維華以  
呈秀最得忠賢權欲令入閣謀之吳淳夫等先擊去銓  
又恐王紹徽為吏部不肯推呈秀令袁鯨疏攻紹徽而

龔萃肅上閤臣內外兼用疏以堅之自是魯生蕃與杰等分途其黨日相軋矣杰官亦至尚書加少保忠賢誅杰被劾罷名麗逆案贖徒三年輔忠杰本謀搖中宮而事發於志選夢環故得輕論云

曹欽程江西德化人舉進士授吳江知縣賊汚狼籍以淫刑博強項聲巡撫周起元劾之貶秩改順天教授調國子監助教諂附汪文言得為工部主事及文言敗欽程力擠之由座主馮銓父事魏忠賢為十狗之一銓欲害

御史張順言周宗建令李魯生草疏屬欽程上之因及  
李應昇黃尊素而薦魯生及傅樾陳九疇張訥李蕃李  
恒茂梁夢環輩十餘人慎言等四人並削籍欽程於羣  
小中尤無恥日夜走忠賢門卑諂無所不至同類頗羞  
稱之欽程顧驕衆人以忠賢親已給事中吳國華劾之  
忠賢怒除國華名欽程益得志給事中楊所修緣忠賢  
指力薦其賢遂由員外郎擢太僕少卿後忠賢亦厭之  
六年正月為給事中潘士聞所劾忠賢責以敗羣削其

籍瀕行猶頓首忠賢前曰君臣之義已絕父子之恩難忘絮泣而去忠賢誅入逆案首等論死繫獄久之家人不復饋食欽程掠他囚餘食日醉飽李自成陷京師欽程首破獄出降自成敗隨之西走不知所終福王時定從賊案欽承復列首等當忠賢盛時其黨爭搏擊清流獻諂希寵最著者石三畏張訥盧承欽門克新劉徽智鋌三畏交河人知文登曹二縣大著貪聲以御史陳九疇薦得行取趙南星秉銓出為王府長史故事外吏行

取無為王官者三畏以是大恨及忠賢得志三畏諂附之遂授御史首劾都給事中劉宏化護熊廷弼太僕卿吳炯黨顧憲成兩人獲嚴譴追論京察三變力詆李三才王圖孫丕揚曹于汴湯兆京王宗賢顧憲成胡忻王元翰王淑朴趙南星張問達王允成涂一榛王象春等十五人而薦喬應甲徐兆魁等十三人於是三才等生者除名死者追奪已極論三案請以其疏付史館而劾禮部侍郎周炳謨南京尚書沈儆疇大理丞張廷拱三



人亦獲譴三畏為忠賢十孩兒之一又倚呈秀為薦主  
鍛成楊左之獄咆哮特甚一日赴戚晚宴魏良卿在焉  
三畏醉誤令優人演劉瑾酗酒一劇忠賢聞大怒削籍  
歸忠賢亟借忤璫名起故官為南京御史朱純所劾罷  
去訥閹中人由行人擢御史承忠賢指首劾趙南星十  
大罪并及御史王允成吏部郎鄒維璉程國祥夏嘉遇  
忠賢大喜立除南星等名且令再奏乃羅織兵部侍郎  
李邦華湖廣巡撫孫鼎相舊給事中毛士龍魏大中光

祿少卿史記事等十七人誣以賄南星得官諸人並獲罪尋請毀東林闕中江右徽州諸書院痛詆鄒元標馮從吾余懋衡孫慎行并及侍郎鄭三俊畢懋良等亦坐削奪復劾罷江西巡撫韓光祐訥為忠賢鷹犬前後搏擊用力多忠賢深德之用其兄太僕少卿樸至南京戶部尚書加太子太保樸官宣大總督為忠賢建四祠兄弟並入逆案承欽餘姚人由中書舍人擢御史首劾罷戶部侍郎孫居相等因言東林自顧憲成李三才趙南

星而外如主圖高攀龍等謂之副帥曹于汴湯北京史

記事魏大中袁化中謂之先鋒丁元薦沈正宗李朴賀

娘為之敢死軍人孫丕揚鄒元標謂之土木魔神請以

黨人姓名罪狀標示海內忠賢大喜敕所司刊籍凡黨

人已罪未罪者悉編名其中承欽官至太僕少卿卒克

新汝陽人由青州推官擢御史劾右庶子葉燦光祿卿

錢春按察使張光縉倚傍門戶且請速誅熊廷弼忠賢

大喜立傳旨行刑以閣臣固爭乃令俟秋後而除燦等

名御史吳裕中廷弼姻也憤曰廷弼已死人何必疏促  
與克新絕逆黨由此銜之廷弼之禍大學士丁紹軾有  
力焉馮銓因使人嗾裕中劾紹軾而先報忠賢曰裕中  
必為廷弼報讐裕中疏上遂命于午門杖之百昇至家  
死魏廣微將謝政克新言廣微砥柱狂瀾厥功甚偉宜  
錫之溫綸優以禮數以是稍失忠賢意太倉人孫文勇  
與同里武進士顧同寅嘗客廷弼所廷弼死文勇為詩  
誄之同寅題尺牘亦有追惜語為邏卒所獲克新遽以

誹謗聞兩人遂棄市連及同郡編修陳仁錫故修撰文  
震孟並削籍克新尋巡按山東崇禎初引疾去徽清苑  
人由臨淮知縣擢御史陳朝輔劾馮銓徽出疏繼之且  
曰臣與銓同鄉痛惡羣小之悞銓不忍銓坐失燕趙本  
色聞者笑之出督遼餉乾沒不貲初梁夢環巡關誣熊  
廷弼侵盜軍貲十七萬徽言廷弼原領帑金三十萬茫  
無所歸其家貲不下百萬而僅以十七萬還公家何以  
申國法因誣給事中劉宏化毛士龍御史樊尚燝房可

壯賊賄事忠賢喜削宏化等籍敕所司徵廷弼賊尋加

徽太僕少卿先後頌忠賢至十疏忠賢敗被劾回籍

鋌元氏人舉鄉試受業趙南星門授知縣由魏廣微通

於忠賢得擢御史遂疏詆南星為元惡先後劾罷禮部

侍郎徐光啟等鋌以乙榜起家欲得忠賢歡搏擊彌銳

忠賢大喜加太僕少卿以憂歸崇禎初禮部主事喬若

震劾鋌及陳九疇張訥為魏廣微爪牙詔奪職後與三

畏訥承欽克新徽並入逆案訥遣戍三畏等論徒當忠

賢橫時宵小希進干寵皆陷善類以自媒始所擊皆東林也其後凡所欲去者悉誣以東林而逐之自四年十月迄熹宗崩斃詔獄者十餘人下獄謫戍者數十人削奪者三百餘人他革職貶黜者不可勝計

王紹徽咸寧人尚書用賓從孫也舉萬曆二十六年進士授鄒平知縣擢戶科給事中居官強執頗以清操聞湯賓尹號召黨與圖柄用吏部尚書孫丕揚以紹徽其門生用年例出為山東參議紹徽辭疾不就泰昌時起

通政參議遷太僕少卿被劾引疾尋以拾遺罷天啓四年冬魏忠賢既逐去左光斗即召紹徽代為左僉都御史明年六月進左副都御史尋進戶部侍郎督倉場甫視事改左都御史十二月拜吏部尚書忠賢為從子良卿求世封紹徽即為奏請良卿封伯請推崇其三世紹徽亦議如其言至忠賢遣內臣出鎮紹徽乃偕同官陳四不可王恭厰朝天宮並災紹徽言誅罰過多忤忠賢意得譙讓已復上言四方多事九邊缺饟難免催科乞



定分數寬年限以緩急之宜付撫按正殿既成兩殿宜  
緩請敕工部裁省織造瓷器諸冗費用佐大工奸黨自  
除已盡恐藏禍蓄怨反受中傷逮繫重刑加於封疆顯  
過三案巨奸則人心悅服餘宜少寬貸復忤忠賢意初  
紹徽在萬厯朝素以排擊東林為其黨所推故忠賢首  
用居要地紹徽倣民間水滸傳編東林一百八人為點  
將錄獻之令按名黜汰以是益為忠賢所喜既而奸黨  
轉盛後進者求速化妬諸人妨已擬次第逐之孫杰乃

謀使崔呈秀入閣先擊去紹徽令御史袁鯨張文熙詆紹徽朋比鯨再疏列其鬻官穢狀遂落紹徽職而以周應秋代逆案既定紹徽削籍論徒應秋金壇人萬曆中進士歷官工部侍郎生平無特操天啟三年避東林謝病去明年冬魏忠賢起為南京刑部左侍郎五年召拜刑部添註尚書時忠賢廣樹私人悉餌以顯爵故兩京大僚多添註尋改左都御史家善烹飪每魏良卿過進豚蹄留飲良卿大歡時號煨蹄總憲明年七月代紹徽

為吏部尚書與文選郎李夔龍鬻官分賄清流未盡逐者應秋毛舉細故削奪無虛日忠賢門下有十狗應秋其首也冒三殿功屢加太子太師初楊漣等拷死應秋夜半叩戶語其館客曰天眼開楊漣左光斗死矣莊烈帝嗣位被劾歸已入逆案遣戍死弟維持天啟中為御史請刊黨籍盡燬天下書院俄劾兵部尚書趙彥等並削籍以兄應秋在位引嫌歸崇禎初起按浙江被劾罷兄弟竝麗逆案

霍維華東光人萬曆四十一年進士除金壇知縣徵授

兵科給事中天啟元年六月中官王安當掌司禮監印

辭疾居外郎冀得溫旨即視事安與魏忠賢有隙奄人

陸蓋臣者維華內弟也偵知之以告維華故與忠賢同

郡交好遂乘機劾安忠賢輒矯旨殺之劉一燝周嘉謨

咸惡維華用年例出為陝西僉事其同官孫杰言維華

三月兵垣無過失一燝嘉謨仰王安鼻息故擯於外忠

賢大喜立逐兩人而維華亦以外艱歸四年冬朝事大

變南京御史呂鵬雲以外轉請告忠賢傳旨令與被察  
徐大化年例外轉孫杰俱擢京卿維華及王志道郭興  
治徐景濂賈繼春楊維垣並復故官維華得刑科諸為  
趙南星斥者競起用事維華益銳意攻東林劾罷御史  
劉璞南京御史涂世業黃公輔萬言揚追論三案痛詆  
劉一燝韓爌孫慎行張問達周嘉謨王之寀楊漣左光  
斗而譽范濟世王志道汪慶百劉廷元徐景濂郭如楚  
張捷唐嗣美岳駿聲曾道唯請改光宗實錄宣其疏史

館忠賢立傳旨削一燬等五人籍逮之案免李可灼戍  
擢濟世巡撫志道等京卿嗣美以下悉起用實錄更撰  
而以閣臣言免一燬等罪尋言總督張我續宜罪尚書  
趙彥宜去御史方震孺不宜逮韓敬宜復官湯賓尹宜  
雪忤忠賢意傳旨譙責之五年冬擢太僕少卿明年擢  
本寺卿尋擢兵部右侍郎署部事每陳奏必頌忠賢七  
年延綏奏捷進右都御史廕子錦衣千戶寧錦敘功進  
兵部尚書視侍郎事廕子如之俄敘三殿功加太子太

保維華性儉邪與崔呈秀為忠賢謀主所親為近侍宮  
禁事皆預知因進仙方靈露飲帝初甚甘之已漸厭及  
得疾體腫忠賢頗以咎維華維華甚懼而慮有後患欲  
先自貳於忠賢乃力辭寧錦恩命讓功袁崇煥乞以已  
廕授之忠賢覺其意降旨頗厲無何熹宗崩忠賢敗維  
華與楊維垣等彌縫百方其年十月以兵部尚書協理  
戎政崇禎改元附璫者多罷去維華自如遼東督師王  
之臣免代者袁崇煥未至維華謀行邊自固帝已可之

給事中顏繼祖極論其罪言維華狡人也璫熾則借璫  
璫則敗攻璫擊楊左者維華也楊左逮而陽為救者亦  
維華也以一給事中三年躡至尚書無敘不及有資必  
加即維華亦難以自解乃寢前命頃之言者踵至維華  
乃引退逆案既定維華戍徐州氣勢猶盛七年駱馬湖  
淤維華言於治河尚書劉綎嗣請自宿遷抵徐州穿渠  
二百餘里引黃河水通漕冀敘功復職綎然其計費  
金錢五十餘萬工不成下獄論死維華意乃沮九年邊



事急都御史唐世濟薦維華邊才至下獄遣戍維華遂  
憂憤死福王時楊維垣翻逆案為維華等訟冤章下吏  
部尚書張捷重述三朝舊事力稱維垣等忠追賜卹典  
贈廕祭葬諡全書維華及劉廷元呂純如楊所修徐紹  
吉徐景濂六人贈廕祭葬不予諡者徐大化范濟世二  
人贈官祭葬者徐揚先劉廷宣岳駿聲三人復官不賜  
卹者王紹徽徐兆魁喬應甲三人他若王若完黃克纘  
王永光章光岳徐鼎臣徐卿伯陸澄源名不麗逆案而

為清議所抑者亦賜卹有差徐大化會稽人家京師由庶吉士改御史以京察貶官再起再貶至工部主事孫丕揚典京察坐不謹落職故事大計斥退官無復起者萬厯末羣邪用事文選郎陸卿榮破例起之天啟初屢遷刑部員外郎結魏忠賢劉朝為之謀主給事中周朝瑞劾其奸貪御史張新詔抉其閨房之隱大化愧沮已承張鶴鳴指力詆熊廷弼及廷弼入關又請速誅與朝瑞相訐尚書王紀劾罷之尋復罹察典削職四年冬中

旨起大理丞益與魏廣微比助忠賢為虐疏薦邵輔忠  
姚宗文陸卿榮郭鞏等十三人即召用俄遷少卿左僉  
都御史楊連等下獄大化獻策於忠賢曰彼但坐移宮  
罪則無賊可指若坐納楊鐫熊廷弼賄則封疆事重殺  
之有名忠賢大悅從之由是諸人皆不免尋進左副都  
御史歷工部左右侍郎皇極殿成加尚書貪恣無忌忠  
賢亦厭之七年四月以受賄那內庫銀事發勒間住後  
入逆案戊死李蕃日照人與李魯生皆萬歷四十一年

進士蕃由廬江知縣入為御史魯生亦方居垣中皆為  
魏忠賢心腹孫承宗請入朝蕃以王敦李懷光為比承  
宗遂還鎮諸國楨當國不為忠賢所喜蕃希指劾去之  
同官排擊忠良多其代草始與魯生諂事魏廣微廣微  
敗改事馮銓銓寵衰又改事崔呈秀時號兩人為四姓  
奴出督畿輔學政建祠天津河間真定呼忠賢九千歲  
加太僕卿視御史事忠賢敗被劾罷魯生霑化人知邢  
臺邯鄲儀封祥符四縣擢兵科給事中由座主廣微通

於忠賢卑汚奸險常參密謀周起元劾朱童蒙魯生希  
忠賢指攻罷起元時中旨頻出朝端以為憂魯生獨上  
言執中者帝用中者王旨不從中出而誰出舉朝大駭  
內閣缺人詔舉老成幹濟者馮銓資淺年未及四十魯  
生蕃欲令入閣魯生遂上言成即為老而非必老乎年  
幹乃稱濟而即有濟于國銓果柄用時有十孩兒之號  
魯生其一也嘗薦阮大鍼陳爾翼張素養李嵩張捷輩  
十一人悉其私黨疏詆家居大學士韓爌削其籍主事

呂下問治徽州吳養春獄株累者數百家知府石萬程不能堪棄官去魯生反劾罷萬程遷左給事中典試湖廣發策詒楊漣因歷詆屈原宋玉等冒寧錦功進太僕少卿莊烈帝即位魯生知禍及疏請免漣等追贓給事中汪始亨顧繼祖御史張三謨交章發其奸始罷去御史汪應元再劾之乃削籍又有李恒茂者邢臺人為禮科給事中薦呈秀復官與深相得劾罷侍郎扶克儉太僕少卿孫之益太常少卿莊欽鄰皆不附忠賢者也恒

茂魯生蕃日走吏兵二部交通請托時人爲之語曰官  
要起問三李後忽與呈秀交惡削藉歸忠賢敗起故官  
爲御史鄒毓祚劾罷逆案既定魯生遣戍蕃恒茂贖徒  
爲民

閻鳴泰清苑人萬厯中進士除戶部主事屢遷遼東參  
政拾遺被劾罷歸久之起僉事分巡遼海開原既失經  
略熊廷弼遣撫瀋陽半道慟哭而返尋託疾謝歸天啟  
二年起故官監軍山海關旋進副使受知孫承宗屢疏

推薦而鳴泰實無才略工諂佞以虛詞罔上而已其年八月廷推鳴泰遼東經略會承宗自請督師乃擢右僉都御史巡撫遼東自王化貞棄地後巡撫罷不設至是承宗以重臣當關事權獨操鳴泰不能有所為明年五月復移疾去家居三年魏忠賢竊柄鳴泰潛結之用御史智鋌薦召為兵部右侍郎六年正月寧遠告急畿輔震驚內閣顧秉謙等以順天巡撫吳中偉非禦侮才薦鳴泰代之未幾代王之臣總督薊遼保定軍務寧遠敘



功進本部尚書以繕修山海關城進太子太傅尋召還  
協理戎政敘錦州功加少保三殿成加少師兼太子太  
師熹宗崩代崔呈秀為兵部尚書鳴泰由忠賢再起專  
事諂諛每陳邊事必頌功德於薊遼建生祠多至七所  
其頌忠賢有民心依歸即天心向順語聞者咋舌崇禎  
初為言者劾罷後麗逆案遣戍死生祠之建始於潘汝  
楨汝楨巡撫浙江徇機戶請建祠西湖六年六月疏聞  
於朝詔賜名普德自是諸方效尤幾遍天下其年十月

孝陵衛指揮李之才建之南京七年正月宣大總督張  
樸宣府巡撫秦士文宣大巡按汪裕張素養建之宣府  
大同應天巡撫毛一鷺巡按王珙建之虎邱二月鳴泰  
與順天巡撫劉詔巡按倪文煥建之景忠山宣大總督  
樸大同巡撫王黠巡按養素又建之大同三月鳴泰與  
詔文煥巡按梁夢環建之西協密雲了髻山又建之昌  
平通州太僕寺卿何宗聖建之房山四月鳴泰與鳴撫  
袁崇煥又建之寧前宣大總督樸山西巡撫曹爾禎巡

按劉弘光又建之五臺山庶吉士李若琳建之蕃育署  
工部郎中曾國禎建之盧溝橋五月通政司經歷孫如  
洌順天府尹李春茂建之宣武門外巡撫朱童蒙建之  
延綏巡視五城御史黃憲卿王大年汪若極張樞智鋌  
等建之順天戶部主事張化愚建之崇文門武清侯李  
誠銘建之藥王廟保定侯梁世勲建之五軍營大教場  
登萊巡撫李嵩山東巡撫李精白建之蓬萊閣寧海院  
督餉尚書黃運泰保定巡撫張鳳翼提督學政李蕃順

天巡按文煥建之河間天津河南巡撫郭增光巡按鮑  
奇謨建之開封上林監丞張永祚建之良牧嘉蔬林衡  
三署博平侯郭振明等建之都督府錦衣衛六月總漕  
尚書郭尚友建之淮安是月順天巡按盧承欽山東巡  
按黃憲卿順天巡按卓邁七月長蘆巡鹽龔萃肅淮揚  
巡鹽許其孝應天巡按宋禎漢陝西巡按莊謙各建之  
所部八月總河李從心總漕尚友山東巡撫精白巡按  
黃憲卿巡漕何可及建之濟寧湖廣巡撫姚宗文鄖陽

撫治梁應澤湖廣巡按溫臯謨建之武昌承天均州三  
邊總督史永安陝西巡撫故廷晏巡按謙袁鯨建之固  
原太白山楚王華奎建之高觀山山西巡撫牟志夔巡  
按李燦然劉弘光建之河東每一祠之費多者數十萬  
少者數萬剝民財侵公帑伐樹木無算開封之建祠也  
至毀民舍二千餘間創公殿九楹儀如帝者參政周鏘  
祥符知縣季寓庸恣為之巡撫增光俛首而已鏘與魏  
良卿善祠成熹宗已崩猶抵書良卿為忠賢設滲金像

而都城數十里間祠宇相望有建之內城東街者工部  
郎中葉憲祖竊歎曰此天子幸辟雍道也土偶能起立  
乎忠賢聞即削其籍上林一苑至建四祠童蒙建祠延  
綏用琉璃瓦詔建祠薊州金像用冕旒凡疏詞揄揚一  
如頌聖稱以堯天舜德至聖至神而閣臣輒以駢語褒  
答中外若響應運泰迎忠賢像五拜三稽首率文武將  
吏列班階下拜稽首如初已詣像前祝稱某事賴九千  
歲扶植稽首謝某月荷九千歲拔擢又稽首謝還就班

復稽首如初禮運泰請以遊擊一人守祠後建祠者必  
守其孝等方建祠揚州將上梁而熹宗哀詔至既哭臨  
釋纓易吉相率往拜監生陸萬齡至謂孔子作春秋忠  
賢作要典孔子誅少正卯忠賢誅東林宜建祠國學西  
與先聖竝尊司業朱之俊輒為舉行會熹宗崩乃止而  
華奎誠銘輩以藩王之尊戚晚之貴亦獻謠希恩祝釐  
恐後最後巡撫楊邦憲建祠南昌毀周程三賢祠益其  
地鬻澹臺滅明曳其像碎之比其疏至熹宗已崩莊烈

帝且閱且笑忠賢覺其意具疏偽辭帝輒報允無何忠賢誅諸詞悉廢凡建祠者槩入逆案云

賈繼春新鄉人萬厯三十八年進士歷知臨汾任邛二縣入為御史李選侍移曦鸞宮一時頗逼迫然故無恙也繼春聽流言上書內閣方從哲等畧言新君御極首導以違忤先皇逼逐庶母通國痛心昔孝宗不問昭德先皇優遇鄭妃何不輔上取法且先皇彌留面以選侍諭諸臣而玉體未寒愛妾莫保忝為臣子夫獨何心給



事中周朝瑞駁之繼春再揭謂選侍雉經皇八妹入井至稱選侍為未亡人楊漣乃上移宮始末疏謂宸宮未定先帝之社稷為重則平日之寵愛為輕及宸居已安既盡臣子防危之忠即當體聖主如天之度臣所以請移宮者如此而蜚語謂選侍踉蹌徒跣屢欲自裁皇妹失所投井恐釀今日之疑端流為他年之實事帝於是宣敕數百言極言選侍無狀嚴責廷臣黨庇時繼春出按江西便道旋里馳疏自明上書之故中有威福大權

莫聽中涓旁落語王安激帝怒嚴旨切責令陳狀於是御史張慎言高弘圖連章為求寬帝益怒下廷臣雜議尚書周嘉謨等言臣等意陛下篤念聖母不能忘選侍及誦敕諭知聖心自體恤而繼春誤聽風聞慎言等又連疏瀆奏然意本無他罪當宥未報御史王大年張捷周宗建劉廷宣給事中王志道倪思輝等交章論救給事御史復合詞為請諸閣臣又於講筵救之乃停慎言弘圖大年俸宥志道等既而繼春回奏詞甚哀且隱雉

經入井二語帝嚴旨窮詰令再陳嘉謨等復力救帝不  
許繼春益窘惶恐引罪言得之風聞乃除名永錮時天  
啟元年四月也其後言者屢請召還帝皆不納四年冬  
魏忠賢既逐楊漣等即以中旨召復官至則重述移宮  
事極言漣與左光斗目無先皇罪不容死且漣因傳檄  
發汪文言事知福及故上劾內疏先發制人天地祖宗  
所必殛而止坐納賄結黨則漣等當死之罪未大暴天  
下宜速定爰書布中外昭史冊使後世知朝廷之罪漣

等以不道無人臣禮也疏娓娓數百言且請用楊所修  
言亟修三朝要典忠賢大喜莊烈帝即位繼春方督學  
南畿知忠賢必敗馳疏劾崔呈秀及尚書田吉順天巡  
撫單明詡副都御史李夔龍羣小始自貳旋由太常少  
卿進左僉都御史與霍維華輩力扼正人崇禎改元五  
月給事中劉斯球極言其反覆善幻乃自引歸已楊漣  
子之易疏訐之詔削籍初繼春以移宮事詆漣結王安  
圖封拜後見公議直漣畏漣嚮用俛首乞和聲言疏非

已意還朝則極詆漣及忠賢殛又極譽高弘圖之救漣  
且薦韓爌倪元璐以求容於清議帝定逆案繼春不列  
名帝問故閣臣言繼春雖反覆持論亦可取帝曰惟反  
覆故為真小人遂引交結近侍律坐徒三年自恨死

田爾耕任邱人兵部尚書樂孫也用祖廕積官至左都  
督天啟四年十月代駱思恭掌錦衣衛事狡黠陰賊與  
魏良卿為莫逆交魏忠賢斥逐東林數興大獄爾耕廣  
布偵卒羅織平人鍛鍊嚴酷入獄者卒不得出宵人希

進者多緣以達於忠賢良卿復左右之言無不納朝士  
輻輳其門魏廣微亦與締姻時有大兒田爾耕之謠又  
與許顯純崔應元楊寰孫雲鶴有五彪之號累加至少  
師兼太子太師廕錦衣世職者數人歲時賞賚不可勝  
紀顯純等加官亦如之忠賢敗言者交劾下吏論死崇  
禎元年六月與顯純並伏誅顯純定興人駙馬都尉從  
誠孫也舉武會試擢錦衣衛都指揮僉事天啟四年劉  
僑掌鎮撫司治汪文言獄失忠賢指得罪以顯純代之

顯純畧曉文墨性殘酷大獄頻興毒刑鍛鍊楊連左光

斗周順昌黃尊素王之寀夏之令等十餘人皆死其手

諸人供狀皆顯純自為之每讞鞠忠賢必遣人坐其後

謂之聽記其人偶不至即袖手不敢問應元大興人市

井無賴充校尉冒緝捕功積官至錦衣指揮雲鶴霸州

人為東廠理刑官寰吳縣人隸籍錦衣為東司理刑凡

顯純殺人事皆應元等共為之而寰為田爾耕心腹及

顯純論死法司止當應元雲鶴寰戍後定逆案三人竝

論死寰先死戍所

明史卷三百六



欽定四庫全書

明史卷三百六考證

焦芳傳服闋授太常少卿兼侍講學士尋擢禮部右侍郎怨劉健已臣方煒按是時李傑亦自翰林出為南祭酒服闋行除徐溥欲還傑故官劉健不可曰焦芳日夜伺此今日援傑他日能拒芳耶溥不聽及傑入芳亦兼程至因授太常少卿兼學士見識大錄所謂怨健已者指此謹附考

焦芳傳又上言禦邊四事以希進用

臣方煒按芳所

上四事明實錄諸書均無所考謹識

焦芳傳會文升去遂擢為吏部尚書

臣方煒按文升

致仕在正德元年四月見明史實錄謹附識

焦芳傳韓文將率九卿劾劉瑾當首吏部以疏告芳芳

陰洩其謀於瑾瑾遂逐文及健遷輩

臣方煒按上

疏時文等告芳芳佯曰我大臣也知格君心而已及

帝召諸臣左順門芳故曳履徐行曰今日之事為首

者當之是日帝不得已允文等奏待明旦發旨捕瑾等下獄會日暮方即馳白瑾且洩羣臣詰朝伏闕之事其事乃變見明史紀事本末謹附識

焦芳傳子黃中亦傲很不學廷試必欲得第一李東陽王鏊為置二甲首芳不悅言於瑾徑授翰林檢討俄進編修臣方煒按四年七月內批陞黃中編修見明實錄謹附識

焦芳傳瑾以禮等皆遷鄉人而詔草出健因下四人詔

獄

臣方煒按是時劉宇阿瑾意劾有司訪舉失實遂下四人詔獄見明史紀事本末謹附識

焦芳傳乃黜健遷為民而榜逐餘姚人之為京官者

臣方煒按是時周禮等四人並戍邊見明實錄謹附識

焦芳傳宜裁減解額五十名通籍者勿選京職著為令

臣方煒按芳既裁江西解額復增河南陝西山西山東各三十名再會試南北有定額乃以四川入南

卷而均南北各一百五十名見明實錄謹附識

焦芳傳瑾大怒數於衆中斥芳父子

臣方煒按土官

岑濬沒入家口當給賜大臣芳聞濬妾美求得嬖之  
至與妻操刀相賊而黃中乘芳卧病烝焉瑾聞其事  
於衆中斥之會南司業缺芳欲擠汪俊為瑾所斥愈  
愧沮寘鐫初平禮部以黃中充頒詔使瑾復於左順  
門斥芳芳乃乞歸見識大錄所謂數於衆中斥芳父  
子指此謹附識

焦芳傳

劉宇附

入為左都御史

臣

方煒按宇總督宣

大時論功加太子少保及入為左都御史加太子太

保見明實錄謹附識

焦芳傳

劉宇附

尋轉兵部尚書

臣

方煒按宇為兵部

托保國公家人朱瀛者曰通瑾凡司員有不附己者

宇必使瀛言於瑾令外補兵部郎中楊廷儀廷和弟

也尤諂事宇廷儀能文宇章奏皆廷儀為之見明紀

事本末謹附識

張綵傳擢左僉都御史與戶部右侍郎韓鼎同廷謝鼎  
老拜起不如儀為谷大用張永輩所竊笑瑾方慚而  
綵丰綵英毅大用等皆稱義瑾乃喜

臣

方煒按綵

廷謝後詣瑾瑾預置酒待謂綵曰今日非都憲我幾  
為老韓羞死自是相倚愈深見明紀事本末謹附識  
張綵傳會御史胡節巡按山東還厚遺瑾瑾發之捕節  
下獄少監李宣侍郎張鸞指揮同知趙良按事福建  
還餽瑾白金二萬瑾疏納金於官而按三人罪其他

因賄得禍者甚衆

臣方煒按貂璫史鑑瑾納綵言

盡暮夜却金故事於門外人咸以為笑及有因賄得罪者乃知由綵謀益惡之謹附識

張綵傳同瑾謀反

臣方煒按貂璫史鑑瑾一日語綵

曰今天下之怨集於予且奈何綵曰主上無子勢必立宗室子若長且賢公受禍矣不如援幼弱者瑾曰善居數日語綵曰無以宗室為也吾自取之綵告不可瑾怒擲以茗盤綵不敢言及瑾敗卒坐同反謹附



識

張綵傳

李憲附

瑾敗虞禍及亦劾瑾六事

臣方煒按

憲所劾瑾六事明紀事本末諸書皆無考謹識

顧秉謙傳

魏廣微附

孟冬饗廟且頒朔廣微偃蹇後至

給事中魏大中御史李應昇連劾之

臣方煒按大

中劾廣微廣微上疏自理應昇疏繼上語尤切直且引失誤朝賀筭四十祭奠失儀杖一百律嚴旨切責之見明紀事本末謹附識

顧秉謙傳

魏廣微附

先是內閣調旨惟出首輔一人餘

但參議論而已廣微欲擅柄謀之忠賢令衆輔分任政權始分後遂沿為故事

臣方煒按是時帝諭內

閣令次輔等分票各本勿得袖手坐視伴食依回蓋廣微求賢忠為之也見文秉先撥志始謹附識

顧秉謙傳

魏廣微附

疏入大忤忠賢意廣微懼急出景

榮手書自明而忠賢怒已不可解

臣

方煒按楊漣

等之逮在天啟五年六月景榮即以七月免歸見明

紀事本末謹附識

顧秉謙傳 魏廣微附 廣微益懼丐秉謙為解忠賢意少

釋然廣微卒不自安

臣方燁按文秉先撥志始涿

州馮銓始出廣微幕下廣微甚相推引銓復結好忠  
賢謀入閣忠賢因令王體乾侍上時舉甘羅故事銓  
又令御史張樞疏催枚卜內有黑頭相公英妙未可  
少也等語廣微忌之具揭忠賢阻其枚卜銓入相後  
遂與崔呈秀等暗毀廣微適廣微有救楊左之揭忠

賢怒遂不可解謹附識

顧東謙傳初矯旨罪主考丁乾學

臣方煒按乾學官

檢討典試江西策問中引汪直劉瑾忠賢怒降級調外未及赴會錦衣僉事高守謙與乾學有宿怨遂嗾忠賢使緹緝擁入乾學寓矯稱有詔乾學方俯伏守謙等立箠斃之見明紀事本末謹附識

顧東謙傳

黃立極附

忠賢以同鄉故擢禮部尚書兼東

閣大學士

臣

方煒按立極於五年九月晉太子太

保政文淵閣累官左柱國晉少師兼太子太師吏部

尚書中樞殿大學士見宰輔年表傳未載謹附識

顧秉謙傳

施鳳來張瑞圖李國樞等附

其秋施鳳來張

瑞圖李國樞入

臣

方煒按鳳來入閣後累官左柱

國少師兼太子太師吏部尚書中樞殿大學士崇禎

元年三月晉陽太傅致仕瑞國入閣累官與鳳來同

崇禎元年三月致仕晉太保並見宰輔年表謹附識

顧秉謙傳

朱宗道附

宗道蕭山人立極同年進士累官

太子太保禮部尚書以本官兼東閣大學士預機務  
臣方煒按宗道於崇禎元年四月晉少保兼太子  
太保戶部尚書改文淵閣六月致仕晉少傅兼太子  
太傅見宰輔年表謹附識

顧秉謙傳

楊景辰附

景辰瑞圖同縣人萬歷四十一年

進士積官吏部右侍郎與宗道同入閣

臣方煒按

是時景辰晉禮部尚書入閣崇禎元年四月晉太子  
太保改文淵閣六月晉少保致仕見宰輔年表謹附

識

崔呈秀傳御史楊維垣賈繼春相繼力功

臣

方煒按

是時繼維垣等劾呈秀者為南京兵部侍郎潘如禎  
給事中許可徵等見明紀事本末謹附識

崔呈秀傳

倪文煥附

遂引入忠賢幕為鷹犬

臣方煒

按明紀事本末是時如尚寶少卿史紀事戶部主事  
李孔度中書舍人吳之瑞刑部侍郎朱世守太常少  
卿金世俊江西按察使米萬鍾薊州叅議王繼謨皆

先後為文煥所劾者謹附識

崔呈秀傳

田吉附

遷淮陽參議取中旨擢太常少卿視

職方事

臣

方煒按吉遷淮陽參議時不欲外出言

之忠賢格部疏不下尚書周應秋希指留部擢用之  
遷太常少卿見孫承澤山書謹附識

劉志選傳志選感家人言謂已老必先忠賢死竟上之

臣

方煒按志選疏末復云敝臣殫忠弼亮協贊中

興今有伏莽之奸歲頭露尾投閒抵隙思為一網打



盡之計伏乞勅下緝事衙門嚴拏究治見文秉先撥  
志始蓋即指匿名榜也謹附識

劉志選傳與梁夢環並論死

臣方煒按夢環為御史

先後誣劾兵部侍郎唐世濟御史張潑徐如翰兩廣  
總督何士晉給事中程註沈惟炳並獲重譴見明紀  
事本末謹附識

劉志選傳

梁夢環附

志選之劾國紀也忠賢意未逞夢

環偵知之七年二月馳疏極論國紀罪且故詰丹山

藍田二語冀傾后顧事重忠賢亦不能驟行而國紀

竟勒還

臣

方煒按是時忠賢將從中究其事大學

士李國櫓及王體乾交沮之事乃已見明紀事本末

謹附識

劉志選傳

劉詔附

且詔建祠薊州迎忠賢像五拜三稽

首呼九千歲

臣

方煒按薊州生祠成兵備副使耿

如杞見其象垂旒執笏惡之長揖不拜詔即劾之逮  
下鎮撫司掠治旋送刑部尚書薛貞坐以大辟論斬

見孫承澤山書謹附識

劉志選傳

邵輔忠附

起故官天啟五年附忠賢驟遷至

兵部侍郎視尚書事

臣

方煒按明實錄輔忠起故

官天啟元年官順天府丞是時奄人劉朝田詔坐盜  
寶繫獄論死忠賢矯旨移之司禮監給事中毛士龍  
之事幾寢忠賢恨次骨至九月士龍與御史王允成  
李希輔孔先後劾輔忠奸貪輔忠大懼朝等因誘以  
起擢令攻士龍輔忠遂誣訐士龍貪淫諸罪于是士

龍除名而輔忠亦落職開住士龍傳所載亦同是輔忠起故官後又有被劾落職一節傳未載謹附考

劉志選傳

邵輔忠附

諸奸黨攻擊正人多其所主使

臣方煒按蘇民因逮周順昌擊緹綺時輔忠貽書巡撫毛一鷺曰急以文震孟姚希孟入告少宰虛席以待毛一鷺業已擒顏佩韋等五人具獄事乃已見明紀事本末謹附識

劉志選傳

孫杰附

大學士馮銓由李魯生李蕃擁戴為

首輔素與崔呈秀暱而杰與霍維華以呈秀最得忠  
賢懼欲令入閣謀之吳淳夫等先擊去銓又恐王紹  
徽為吏部不肯推呈秀令袁鯨疏攻紹徽而龔華肅  
上閣臣內外兼用疏以堅之 臣方煒按是時杰等

與淳夫及盧承欽李燦然王業浩劉徽等合謀令陳  
朝輔先發淳夫繼之遂攻去銓及袁鯨與劉徽先後  
攻紹徽紹徽覺其謀遂於辨疏中發之曰有所推轂  
則必有所摧折者此也衆懼忠賢知之乃寢其事見

明紀事本末謹附識

曹欽程傳

張訥附

承忠賢指首劾趙南星十大罪

臣

方煒按訥所劾南星十大罪明紀事本末諸書均無

可考謹識

曹欽程傳

張訥附

訥為忠賢鷹犬前後搏舉用力多

臣方煒按是時忠賢懷逆謀憚瑞惠桂三王在內訥

即疏趣之藩三王遂行見明紀事本末故崇禎二年

所定逆案訥罪狀有桐封迫遣實贊陰謀二語傳未

及謹附識

曹欽程傳

盧承欽附

首劾罷戶部侍郎孫居相等

臣

方煒按是時與居相並被承欽劾罷者為太僕少卿  
徐夢麟大理卿曹珍工部侍郎董應舉給事中李遇  
知見明實錄謹附識

曹欽程傳

盧承欽附

請以黨人姓名罪狀榜示海內

臣方煒按承欽是疏在天啟五年十二月於是黨籍  
刊而三朝要典之議起見明紀事本末謹附識

曹欽程傳

門克新附

且請速誅熊廷弼

臣方煒按是

時與克新並希忠賢指趣速誅廷弼者為郭興治石

三畏卓邁等見廷弼本傳謹附識

曹欽程傳

劉徽附

由臨淮知縣擢御史

臣方煒按大

學士朱國之子也由徽與李蕃所劾見明紀事本末

謹附識

曹欽程傳

智鉞附

崇禎初禮部主事喬若雯劾鉞

臣

方煒按崇禎二年所定逆案鉞罪案云通內得選北



道叅解學龍侯恪至於削奪謹附識

王紹徽傳忠賢遣內臣出鎮紹徽乃偕同官陳四不可

臣方煒按紹徽所陳四不可明紀事本末諸書均

無考謹識

王紹徽傳

應秋附

忠賢門下有十狗應秋其首也

臣

方煒按應秋父事忠賢先後頌忠賢至三十九本見

孫承澤山書謹附識

霍維華傳每陳奏必頌忠賢

臣

方煒按維華覆忠賢

叙功疏有茅土尚覺其輕語聞者咋舌見明紀事本末謹附識

霍維華傳七年駱馬湖淤臣方燁按駱馬湖淤河渠

志作八年此作七年互異謹附考

霍維華傳徐大化附忠賢敗被劾罷臣方燁按明紀

事本末是時劾罷蕃者為給事中顏繼祖御史王之

朝謹附識

霍維華傳李魯生附主事呂下問治徽州吳養春獄株

累者數百家知府石萬程不能堪棄官去魯生反劾

罷萬程

臣

方煒按是時下問與大理寺丞許志吉

窮治其事蔓引慘毒萬程不忍力爭不得遂棄官去  
徽民激變而忠賢以發奸論功廕錦衣指揮見明紀  
事本末謹附識

閻鳴泰傳承宗以重臣當關事權獨操鳴泰不能有所  
為明年五月復移疾去

臣

方煒按通鑑輯覽稱是

時承宗亦察鳴泰無實畧軍事多不與議鳴泰怏怏

求去承宗亦引疾帝乃罷鳴泰慰留承宗謹附識

閻鳴泰傳巡按宋禎漢

臣方煒按宋禎漢明紀事本

末作宋禎模與此互異謹附考

閻鳴泰傳每一祠之費多者數十萬少者數萬剝民財

侵公帑伐樹木無算

臣方煒按諸祠窮工巧像皆

沉香木為之眼目耳口宛轉如生腹中肺腸皆金玉  
珠寶所為髻空穴其一以簪四時香花一祠像頭稍  
大匠人急削之小豎抱頭慟哭責匠人見明紀事本

末謹附識

閻鳴泰傳而都城數十里祠宇相望

臣

方煒按是時

潘汝禎建祠浙江巡按劉之待會稿遲一日即削籍  
見通鑑輯覽薊州道胡士容不具建祠文矯旨逮治  
為許顯純掠治論死見明紀事本末謹附識

閻鳴泰傳監生陸萬齡至謂孔子作春秋忠賢作要典  
孔子誅少正卯忠賢誅東林宜建祠國學西與先聖  
並尊司業朱之後輒為舉行

臣方煒按文秉先撥

志始萬齡疏具之後為奏請中旨許之之後復榜於  
通衢曰魏上公之功在禹之下孟子之上明紀事本  
末稱莊烈帝嗣位後之後疏劾萬齡下之獄蓋始則  
徇萬齡以媚逆璫繼乃借一劾以掩前罪故之後於  
逆案竟得漏網謹附識

田爾耕傳

許顯純傳

楊連左光斗周順昌黃尊素王之

案夏之令等十餘人皆死其手

臣

方燁按顯純之

希指斃連等也每人一死即剔喉骨貯以小匣送忠

賢處以示信見文秉先撥志始謹附識

明史卷三百六考證





總校官編修臣吳紹潔